



TŌKU MĀPIHI MAUREA WHĀNAU TAUTOKO INCORPORATED

137 Silverdale Road
Silverdale
Hamilton

Ph 07-856 8266
Fax 07-858 3426
whanautautokoinc@gmail.com

25 Hui-tanguru 2020

Tēnā tātou e ngā whānau o Tōku Māpihi Maurea

Ko te pūtake o tēnei pānui, ko te whakamārama noa i te āhua o ngā mahi a te komiti a te Mana Tōpū, tae atu ki ā tātou whakaritenga mō tēnei tau. Inā he pātai āu, tēnā koa, whakapā mai.

He aha tā te Mana Tōpū mahi?

Nō te tau 2012 a *Tōku Māpihi Maurea Whānau Tautoko Incorporated* i whakatūngia ai e ētahi o te whānau o tō tātou kura. Ko ngā whāinga matua ā te komiti, ko te whakatuārā i te reo Māori i roto i te mātauranga, me te tautoko, te hapahapai anō hoki i te whakawhanake tonutanga o te Hapori o Tōku Māpihi Maurea, arā, i te whānau o te kura.

He komiti iti a te Mana Tōpū e hui ai i tētahi ahiahi Mane/Rāhina o ia marama, mō te hāwhe haora noa. He komiti tēnei o ētahi mema o te whānau me tō tātou tumuaki a Kōkē Laura. I te nuinga o te wā, ka hāngai ā tātou rārangi kaupapa ki ngā tono e tautoko ai i te kura me ngā nekehanga e kōkiri ana i ngā tūmomo kaupapa kohi pūtea, tae atu hoki ki te whakariterite i ngā tono pūtea mō ētahi atu o ngā kaupapa nui ake, pērā i te papa tākaro me te kōti hou.

Ngā kaupapa kohi pūtea

Ka whakaritea e te Mana Tōpū kia tū tētahi kaupapa kohi pūtea matua i ia wāhanga ako o te tau.

I tēnei wāhanga ako, ko te Pō Taurima tā tātou kaupapa kohi pūtea matua ka tū hei te Rāpare te 12 o Poutū-te-rangi. Ko ētahi atu kaupapa pūtea i whakatutukihia ai i ngā tau tata ake nei, ko ngā pō kiriata, ngā kaupapa patapatai, me ngā hākari e whakanui ana i a Matariki.

Kua whai wāhi atu ngā kohinga pūtea o aua kaupapa ki te whakatutuki, ki te hāpai rānei i ngā utu o:

- ngā pahī mō te haerenga o ngā ākonga me ngā kaimahi ki te Ahurei o Hauraki
- ngā kākahu hou o ngā tīma haupoi retireti – ka whakamau ā te tau 2020 nei
- whare onepū hou
- papa tākaro hou.

Pō Taurima – te 12 o Poutū-te-rangi 2020

Mā whero, mā pango, ka oti te mahi.

He mihi nui ki a koutou katoa kua tohu kē mai mā ngā Puka Kūkara ā koutou mahi e hāpai ai i te pō taurima mō tēnei tau. Kei ngā pānui ā-kura o ia wiki me tā tātou whārangi Pukamata ngā hono ki aua puka. He tini ngā toa kai, ngā mahi toi, ngā rāwhera, ngā hāngī, me ngā kaupapa whakangungu e tū ai puta noa i taua ahiahi pō. Tēnā koa, whakapāhotia te pō taurima ki ō koutou whanaunga, ō koutou hoa, ō koutou hoa mahi. I te nuinga o te wā ka hoko wawe atu ngā tīkiti hāngī i mua noa atu i te pō taurima, nō reira, kia kamakama inā e hiahia hāngī ana.



TŌKU MĀPIHI MAUREA WHĀNAU TAUTOKO INCORPORATED

137 Silverdale Road
Silverdale
Hamilton

Ph 07-856 8266
Fax 07-858 3426
whanautautokoinc@gmail.com

Anei ngā hononga mā koutou ko ō koutou whānau e hiahia ana ki te whai wāhi mai:

1. Te puka takoha <http://bit.ly/TōkuMāpihiKoha2020>
2. Te puka rehita toa <http://bit.ly/TōkuMāpihiStallholders2020>
3. Te puka tūao <http://bit.ly/TōkuMāpihiVolunteers2020>
4. Te hoko hāngī <http://bit.ly/TōkuMāpihiHangiPre-order2020>

Ngā kaupapa matua hei te tau 2020

Mā te mahi ngātahi o te whānau me te kura, ka eke te tamaiti ki tōna taumata.

Ko tētahi āhuetanga motuhake o ngā kura Māori, ko te kaha tautoko mai o te whānau. Nō tātou te whiwhi i te kaha whai wāhi mai o ngā whānau maha me ngā kaimahi ki te tini o ngā tūmomo kaupapa e hāpai ai i ā tātou tamariki me ngā kaimahi – koutou ngā kaiako, ngā kaiwhakahaere me ngā kaitiaki i roto i ngā tūmomo hākinakina, ngā whānau awahi i ngā haerenga o te kura, koutou e whakapuaki ana i ō koutou pūkenga ki te āwhina i ngā ākongā me ngā kaimahi (i roto i ngā tūmomo kaupapa pērā i te mahi toi, te tunu kai, i te poari hoki), tae atu ki te whai wāhi atu ki te tini o ngā kaupapa ka pupū ake ki te kura, puta noa i te tau, e mihi ana.

I tēnei tau, he hiahia tō tātou ki te toro atu ki huarahi anō e hāpai ake ai, e paihere tonu ai hoki i ō tātou hononga hei whānau, inarā, mā te whakapakari me te whakatuarā tonu i te pūmāutanga o te reo Māori. Tē taea e tātou ngā whānau te whai wāhi atu ki ngā kaupapa katoa i te kura, heoi anō rā, e mihi ana ki ngā huarahi e whāia ana kia whai wāhi mai. Ko te painga tonu, ko te whakawhanaungatanga ka pupū ake ki waenga i a tātou katoa, me te noho mōhio o tētahi ki tētahi.

Hei tēnei wāhanga, ka whakahaerehia tētahi patapatai poto ā-ipurangi, hei whakaemiemi i ngā whakaaro o te whānau mō ngā whāinga o te Mana Tōpū e pā ana ki te reo Māori me te tautoko o te whānau. Tērā pea he whakaaro ōu hei hāpai i aua kaupapa, kei te hiahia rānei koe ki te whai wāhi mai ki ēnei o ngā kaupapa mahi - tēnā koa, whakamōhiotia mai mā te īmēra mai i a mātau ki whanautautokoinc@gmail.com, mā te whakaoti rānei i te patapatai ka puta whai muri i tā tātou Pō Taurima.

Ko tētahi atu kaupapa whakahiriri i whakarewahia ai e te poari ko tētahi hōro hou i te kura, ā, e kōkirihia ana e te Mana Tōpū te toro atu ki ngā huarahi tonu pūtea. Ka mahi ngātahi tātou ko te poari ki te whakatinana i tēnei kaupapa.

Heoi anō rā, nei rā hoki te reo whakahei ki te hunga e hiahia ana pea ki te hono mai ki te Mana Tōpū – tērā pea he rawe ō pūkenga whakariterite, ō pātuitanga rānei, he kaha rānei koe ki te whakatutuki kaupapa, he mātau rānei koe ki te rapu i ngā huarahi pūtea, ki te whakakī rānei i ngā tonu pūtea - nau mai, haere mai! E tuwhera ana ngā hui ki a tātou katoa, ā, ka tohua i ngā pānui ā-kura, i te whārangi Pukamata o te kura hoki ngā whakaritenga mō te hui ka whai ake.

Ngā manaakitanga,

nā te Mana Tōpū